



Emilia Monn - Venzin

Era sche l'Emilia ha duront sia entira veta giu buna communicaziun cun sia patria, vegn ei a dar lectors che san buca propri metter a casa ella. La Milia, sco nus havein adina numnau ella, ei naschida ils 22 da mars 1924 enta Selva ella famiglia da Sep Lurenz e Barla Cathrina Venzin-Loretz. Quei era dils onns che las streglias dil vitg eran buca vitas. Pliras famiglias cun in tschappel affons devan veta al vitget. Ruasseivel vegnev'e i lu gl'unviern duront il di, cu tut la roschada d'affons da Selva e Tschamut haveva dad ir a scola en Sutcrestas.

Emilia ha passentau sia affonza ensemen cun quater frars e quater soras. Bugen havess ella empriu ina clamada. Mo per ina mattatscha dalla Val Tujetsch gest ord scola fuss quei stau da lezzas uras plitost luxus. La plipart dils da Selva saveva buca magliar giu dil mantun dalla rihezia ed aschia era mintga rap per gidar ils da casa beinvegnius. Entgins onns ei Emilia stada en plazzas e giu quitau dil tenercasa tier famiglias a Lucerna e Glion. Sco ella raquintava, eis ella era stada l' emprema cameriera dil Cafe Milar a Rueras. Cameriera ord pissiun seigi ella buca stada. Quei seigi plitost stau, perquei ch'il possessor da quell'ustria eri siu cusrin. Dador gl'uaul, sco ils da Selva schevan, ha ella era fatg enconuschientscha cun il giuven Fidel Monn, fegl da Gion Battesta Monn, canastrè, da Sedrun. Ils 1952 ein els maridai e secasai a Schaffusa. Cheu ein era ses treis affons Margrit, Marianne e Severin naschi. 1964 ha la famiglia midau dimora e secasada ad Ennetbürgen (Sutsilvania). Cheu spel lag ed ella vischinanza dils cuolms ein els veramein stai da casa ed in schi tec pli damaneivel da Tujesch, nua che la famiglia passentava mintg'onn, sche zaco pusseivel, lur vacanzas. Quei ei vegniu pli sempel, cu els ein vegni tier in'atgna dimora ella val. Mo nua? Si Milez ha il Fidel cumprau ina tegia. Buca che l'Emilia fuss stada fetg incantada gl'emprem mument. Mo vesend tgei ch'il Fidel fa plau net ordlunder, ei il plascher era vegnius tier ella. Bia da lur temps liber han els passentau en quella plascheivla tegia en quei idilic liug. Leu ha ella puppergnau bein enqual enconuschent e viandont cun in bien caffè. Vesend co la glieud sediverteva sin las bialas pistas, ha ella empriu pér cun 36 onns dad ir cun skis e stada fideivla a quei sport tochen 75 onns.

A Sutsilvania han Fidel ed Emilia era adina schazegiau da vegrin mintgaton ensemens e dar ina paterlada en nies romontsch da Tujetsch. Lu vegneva per ordinari era dau in scart troccas. Ina episoda dall'Emilia en quei connex vegrin nus mai ad emblidar. Schev'ella duront il giug tuttenina: «Ju a vairamain ina streia,» savevan ils auters ch'ella hagi il bagat.

Emilia ei buca stada ina femna da gronda canera, persuenter ina buna consorta e mumma, che ha giu bien quita dils ses. En sia veta, nua ch'ella ha sco tuts nus era giu da surventscher bein enqual difficultad, ha ella sefidau sin Diu. E demai ch'ella era carschida si a Selva sper Marihelf, ha ella adina teniu ault Nossadunna.

Pervia da sia malsogna demens han Emilia e siu um priu avon strusch dus onns dimora en ina stupenta habitaziun, endrizzada cun atgnas mobiglias el stil grischnunes, en casa da vegls ad Ennetbürgen. La conversaziun cun ella vegneva pli e pli difficultusa. Il davos temps ha aunc il trer flad fatg pli gronds quitaus. La sera, dils 30 da december 2011 eis ella sedurmentada per adina.

Emilia ei ussa ida tier Niessegner. Ils sis da schaner han sia famiglia, ses parents, vischins ed enconuschents dau ad ella il davos salid en in dign ed impressiunont survetsch da sepultura sin santeri ed en baselgia dad Ennetbürgen, cun la vesta, che la mort terrestre seigi buca la fin, mobein l' entschatta dalla veta perpetna.

Berther Adalgott, Dallenwil (NW)